

四庫全書

史部

欽定四庫全書

史部

山西通志卷一百十四

詳校官監察御史_臣查善長

檢討_臣德生覆勘

總校官進士_臣朱銓

校對官學正_臣常循

膳錄監生_臣舒秀岐

欽定四庫全書

山西通志卷一百十四

人物

十四

汾州府

宗

辛仲甫字之翰汾州孝義人曾祖實石州推官祖迪壽陽令父藩河東節度判官仲甫少好學及長能吏事器局沉厚周廣順中郭崇署掌書記顯德初從鎮澶

淵崇親吏為廂虞候部民有被劫殺者訴陰識賊魁
即捕盜吏也官不敢詰仲甫請自捕逮鞫之吏故稽
其獄仲甫曰民被寇害而使自誣服蠹政甚矣馬用
僚佐為請易吏以雪冤憤崇悟移鞫之乃得實狀改
深趙鎮觀察判官宋初崇被監軍陳思誨密奏遣中
使馳往驗之仲甫曰第遠偵使者率僚屬盡郊迎禮
聽彼伺察久當自辨矣崇如其言使者至視崇無他
意遂奏上大喜歸罪於思誨仲甫又隨鎮平盧崇卒

改鄆齊累雪冤枉乾德五年入拜右補闕出知光州
州有橫河與城直會霖潦暴疾水溢潰廬舍仲甫集
船數百艘軍資民儲皆賴以濟六年移彭州州卒謀
長春節為亂屬仲甫出城巡視見壕中草深意可藏
伏命燒雜之克黨疑謀泄自首擒百餘人盡斬之太
祖問羣臣文武兼資者為誰趙普以仲甫對徙益州
兵馬都監代選選為三司戶部判官太平興國初遷
起居舍人使遼遼主問克進何如人如進比有幾仲

甫曰國家名將輩出如進鷹犬材耳何足道哉遼主欲留之仲甫曰信以成命義不可留有死而已竟不能屈使還以刑部郎中知成都府奏免歲輸銅錢罷權酷政尚寬簡蜀人安之八年加右諫議大夫時彭州盜賊連結誘令自縛詣吏者凡百餘人餘因散去九年入知開封府拜御史中丞雍正二年拜給事中參知政事端拱中進戶部侍郎淳化二年罷為工部尚書出知陳州代歸會蜀有寇以仲甫素著恩信將

令輿疾招撫以疾尋加太子少保致仕真宗加太子少傅咸平五年卒年七十四贈太子太保子若冲若海若濛若濟若渝皆能其官孫有孚有隣皆第進士王嗣宗字希阮汾州人曾祖同節寶鼎令祖待價汾州防禦推官文夢證成州軍事判官嗣宗少力學自奮以文謁王祐優待之開寶八年進士第一補秦州司寇參軍知州路冲政苛乘間極言其闕失冲繫嗣宗又教無賴民訟之獲直征河東嗣宗上陳邊事授大

理寺丞通判睦州改右贊善大夫徙河州武德卒潛
察遠方事嗣宗械送京師因奏曰今不委任天下賢
俊猥信此輩以為耳目臣竊不取削秩尋復之以秘
書丞通判澶州並河東西植樹萬株以固隄防上言
本州權酷望並準省斗定罪從之入為三司開折推
官以左正言充河北轉運副使就賜緋魚將議親征
上言遼人必不至狀甚見嘉納改左司諫賜白金千
兩入為度支判官改駕部員外郎坐事罷職尋出知

典元府徙京西轉運使又移河北賜金紫貝州驍捷卒謀竊發率吏悉擒之優詔嘉獎遷虞部郎中賜錢百萬至道初移河東轉運使累知耀同州加比部淮南轉運使江浙荆湖發運使揚楚間有窄家神廟民疾不餌藥竭力致祀嗣宗撤其廟選名方刻石州門自是稍變漕運經泗州浮橋舟多覆徙置城隅遂獲安濟又請以公田均賜外任官就改職方咸平三年以漕運稱職就拜太常少卿踰年以右諫議大夫充

三司戶部使改鹽鐵使請裁節冗費從之明年郊祀
減雜物十萬六千省工九萬九千改左諫議知通進
銀臺司兼門下封駁事出知并州兼并代部署州境
有臥龍王廟窮冬致祭老幼多踣道亟毀之轉運使
鄭文寶上其政績詔褒美先是戰馬瘠弱送闕下道
遠多斃建議就牧汾州從之召拜御史中丞加兼工
部侍郎權判吏部銓嗣宗剛果無所憚每進見極談
時事或及人間細務論孔冕事頗不急上優容之將

祀汾陰以永興重地思得大臣才兼文武者鎮之拜
嗣宗耀州觀察使知永興軍作詩賜之上言宜賜种
放終南田百畝徙放嵩山上令放徙居嵩陽避之四
年徙知邠州兼邠寧環慶路都部署城東有靈應公
廟旁有山穴羣狐處焉民虔禱之語為諱狐音長吏
皆先謁廟後視事嗣宗毀其廟燹其穴得數十狐盡
殺之淫祀遂息徙知鎮州發邊肅脏肅坐貶嗣宗嘗
言徙种放掘邠狐按邊肅為去三害居二歲召還授

樞密副使檢校太保累表辭職授檢校太傅大同軍節度知許州嘗游是州別墅在焉時人以為榮移知河南府天禧初改節感德洛下訛言徙知陝州又改節靜南以左屯衛上將軍檢校太尉致仕面辭特免舞蹈許其子扶掖之對數刻賜錢百萬還許下月給俸五十千嗣宗睦宗族撫諸姪如已子著遺戒訓子孫勿得析居又令以孝經弓劍筆硯置壙中五年卒年七十八廢朝贈侍中諡曰景莊錄其子二人甥二

人官嗣宗事三朝最為宿舊所至以嚴明御下著中陵子三十卷子堯臣內殿承制唐臣太子中舍從子舜臣供俸官閣門祇候禹臣太子中舍

趙昌言字仲謨汾州孝義人父叡從事使府太宗尹開封選為雍邱太康令後終安申觀察判官昌言少有志趙逢高錫寇準皆稱許之太平興國三年舉進士為貢部首薦擢寅甲科為將作監丞通判鄂州拜右拾遺直史館賜緋魚選為荆湖轉運副使遷右補

闕改知青州入拜職方員外郎知制誥預修文苑英
華雍熙初加屯田郎中明年同知貢舉俄出知天雄
軍岐溝失律請誅曹彬等優詔褒答召拜御史中丞
河東用兵多條上邊事為左諫議大夫代張宏為樞
密副使遷工部侍郎坐書瞿穎貶崇信軍節度行軍
司馬初太宗厚遇昌言垂欲相之趙普惡昌言剛辰
將陷以穎獄太宗特寬焉淳化二年起知蔡州逾年
召拜右諫議大夫或議弛茶鹽禁以省轉漕命為江

准兩浙制置茶鹽使昌言極言非便上趣往固執如
初以戶部副使雷有終代之卒以無利罷昌言復知天
雄軍賜錢二百萬豪民時芻蕘誘姦人潛穴隄防歲
仍決溢一日隄吏告急命徑取豪家膏積以給用自
是弊遂絕澶州河決流入御河索禁卒佐隄役不
進昌言怒曰府城將墊人民且溺汝輩食厚祿欲坐
觀耶敢不從命斬衆股慄赴役不浹旬城完手詔褒
諭之召拜給事中參知政事俾乘疾置以入即赴中

書時連雨請出殿馬分牧外郡或以盛秋備敵馬不可闕昌言曰塞下積水敵必不至從之王小波李順搆亂獨請發兵無使滋蔓始命王繼恩等進討昌言攝祭太廟宿齋中因詔對滋福殿復贊兵計遂遣使督繼恩戰命為川峽五十二州招安行營馬步軍都部署賜精鎧良馬白金五千兩別賜手札數幅皆討賊方略自繼恩以下並受節度既行有搆之者乃駐鳳州賊平改戶部侍郎罷政事知鳳翔府徙澶涇延

三州真宗初遷兵部侍郎知陝州移知永興軍咸平三年與呂蒙正寇準同召以本官兼御史中丞知審官院有言門資官不宜任親氏昌言手疏以才不才在人豈以寒雋世家為限遂罷其議加工部尚書仍兼中丞時遣臺吏巡察建議請準故事令左右巡使分領之復言詳斷官宜加慎擇自今有議刑不當嚴示懲罰授以遠官若有罪被問不即引伏者許令追攝又天下大辟斷訖皆錄款聞奏付刑部詳覆用刑

乖理者皆行按劾惟開封府未嘗奏案或斷獄有失
止罪元勘官吏知府判官推官檢法官皆不及責則
何以辨明枉濫表則方夏望自今如外州例施行從
之會孟州民常德方訟臨津尉任懿以賄登第乃知
舉王欽若受之昌言以聞欽若自訴詔邢曷覆案坐
昌言故入奪官貶安遠軍行軍司馬移武勝軍景德
初拜刑部侍郎判尚書都省幸澶淵以盟津居要地
增屯兵命知河陽歷知天雄軍府境內有小盜榜諭

能告執者給賞牙吏即遷職樞密院易其榜徙知鎮
州遷戶部侍郎大中祥符二年卒年六十五贈吏部
尚書諡曰景肅錄子慶嗣為國子監丞賦祿終喪從
孫允明同學究出身昌言喜推獎後進掌漕湖外時
李沆通判潭州謂有台輔之量表聞於朝王旦宰岳
州平江一見識其遠大以女妻之後皆為賢相王禹
偁自卑秩擢詞職亦昌言所薦也昌言強力尚氣概
當官無所顧避所至以威斷立名慶嗣至太子洗馬

田紹斌汾州人仕劉鈞為佐聖軍使戍遼州周顯德四年領五十騎來歸世宗補驍武副指揮使宋初隨崔彥進征李筠以功遷龍捷指揮使鑿澤州濠圍守流矢中左目前軍部署韓令坤以聞及召見於潞州紹斌殺北漢軍益衆又從討李重進於揚州壁城南圍三日城潰斬首踰十級賜袍帶緋帛尋補馬軍副都軍頭龍衛指揮使又從平荆湖嶺南討蜀隸劉延讓率所部敗全師雄於神泉時漢劔道梗因賴以寧道

使賜賚有加凡在蜀三歲剽盜殄除還改龍捷都虞
候嘗盜官馬太祖知其驍勇遣內侍私問之紹斌曰
若恩貸臣死當盡節以報俄復引見釋之且密賜白
金會征江南擇五百人為步鬪軍并雲騎二千領之
抵昇州城下克獲居多親討河東敗遼兵於北百井
太平興國初擢龍衛軍指揮使領江州刺史二年擊
梅山洞蠻至邵州大潰其衆擒蠻二萬令軍中取利
劍二百斬之餘五千遣歸諭諸洞自是帖服賜金帛

緡錢金帶鞍馬厯大武日騎軍指揮使改馬步都軍
頭出戍鎮定高陽關曹彬攻幽州奪牛羊器甲加領
溪州團練使復遣屯北面端拱元年拜冀州防禦使
尋改解州淳化中為河中同丹坊鄜延橫嶺蕃界都
巡檢使鄭文寶議城席雞城砦為清遠軍紹斌領其
役城畢命為知軍事至道元年拜會州觀察使仍判
解州俄充靈州馬步軍部署領徒入蕃斬二千級獲
羊馬橐駝二萬計手詔嘉諭數部金粟帛詣靈武清

遠遠人讐服不擾未幾皇甫繼明白守榮等督轉餉於靈州紹斌率兵援接抵鹹井賊三千餘來薄陣且行且鬪至耀德凡殺千人寇復尾後紹斌為方陣使被傷者居中自將騎三百步弩三百與敵兵确於浦洛河大敗之既而為賊所圍守榮等欲戰紹斌曰蕃戎輕佻勿棄輜重與戰常按轡結陣徐行守榮等恣曰若但率兵來迎勿預吾事紹斌因率所部去輜重四五里繼遷初見紹斌旌旗不敢擊守榮等自欲邀

功與戰大敗紹斌率所部徐還一無遺失優詔褒美就命為靈州都部署兼內外都巡檢使李繼隆言浦洛之敗紹斌握兵不顧自言靈武非我不能守貶右監門衛率府副率虢州安置真宗召授右監門衛大將軍領敘州刺史尋改萊州防禦使詔還其所藉居第賜良馬十四調環慶靈州清遠軍部署慶州野雞族數為寇掠招其酋帥三人斷臂馘割放還寇帖服咸平二年為鎮定高陽關路押先鋒隸傅潛潛遣與

石普並戍保州普與知州楊嗣出兵及夜未還紹斌疑其敗衄即領兵援之普嗣果為賊所困度嚴涼河頗喪師衆及紹斌至即合兵疾戰獲一百四十餘人以勞遷邢州觀察使坐潛逗遛出為左衛率府副率五年授右千牛衛將軍致仕景德初起左龍武軍將軍永城兵馬都監三年遷左監門衛大將軍下徙考城都監大中祥符初領長州刺史遷左領軍衛大將軍領康州團練使鞏縣都監二年卒年七十七紹斌

長兵間習戰法累以格鬪立功子守信內殿崇班閣
門祇候

侯仁寶益子趙普妹壻也蔭遷太子中允盧多遜與普
有隙普罷相即以仁寶知邕州州之右江生毒藥樹
宣化縣人常採貨之仁寶以聞詔盡伐去九年不代
太平興國中陳取交州策太宗令馳驛召歸多遜遽
奏曰若召仁寶其謀必泄蠻夷修備未易取也不如
授仁寶飛輓之任且經度之別遣偏將長驅而往勢

必萬全遂以仁寶為交州水陸計度轉運使前軍發
遇賊鋒甚盛援兵不繼遇害江中上甚悼惜特贈工
部侍郎錄其子延齡延世並為齋郎延齡至殿中丞
延世至太子中舍

侯延廣父仁矩歷通祁雄三州刺史悉以補牙職在雄
州方宴寇數十騎白晝入州城延廣引親信數騎馳
出射殺其首一人斬數級悉擒餘黨仁矩喜拊其背
曰興吾門者必汝也監軍李漢超以聞詔褒美賜錦

袍銀帶仁矩卒補西頭供俸官從党進討太原太平
興國初護延州軍兼緣邊巡檢善撫士卒下樂為用
戎人畏服遷閣門祇候時求可使徼巡西北邊者近
臣言延廣將家子習邊事遷崇儀副使充同鄜坊延
丹緣邊都巡檢使延廣力疾入辭賜名藥及方遣太
醫隨侍戎人聞延廣至不敢復為寇叛卒劉渥嘯聚
千餘人謀入京兆延廣率兵數百自間道追之會於
富平西十五里挺身與渥鬪大樹下斷渥右臂渥脫

走乘勢大敗其衆渥創甚止谷中後數日為追兵所
獲渥素號驍勇無敵至是羣盜喪氣餘黨稍自歸闕
右以定擢拜淳儀使淳化二年命領獎州刺史知靈
州賜金帶名馬部下嚴整戎人悅服李繼遷避其鋒
會騎將李繼隆討趙保忠以延廣護軍既而夏臺平
保忠就縛手詔褒美賜賚甚厚師還留為延州鈐轄
會節帥田重進耄以延廣同知州事兼緣邊都巡檢
使監軍康贊害其功誣奏延廣得虜情恐後倔强難

制遂詔還以慕容德豐代之部內甚不治至道間繼
遷寇靈州同知樞密院事錢若水稱延廣可使就拜
寧州團練使知靈州兼兵馬都部署賜白金二千兩
歲增給錢二百萬延廣獨引數十騎之鎮戎人素服
其威名皆相率引避二年春病遣御醫馳視延廣謂
中使李知信曰延廣家世受國恩今日得死所矣但
恨未立尺寸功耳言訖卒年五十賙賻甚厚以其子
為六品正員官子紹隆東滌院使帶御器械紹隆子

宗亮右侍禁閤門祇候

楊瓊汾州西河人幼事馮繼業以材勇稱太宗召置帳
下即位隸御龍直三遷神勇指揮使從征太原以勞
補御龍直指揮使改弩直都虞候兼御前忠佐馬步
都軍頭領顯州刺史淳化中李順叛為夔峽擒賊招
安使領兵自峽上與賊遇累戰抵渝合進克資普二
州雲安軍斬數千級詔書嘉獎即軍中真拜單州刺
史至道初召還徙知朔州兼鈐轄未幾改防禦使靈

慶路副都部署河外都巡檢使捍禦有功導黃河溉
民田數千頃收賊於合河鎮北獲人畜亡算賊騎五
百掠城下復擊破之追北三十里並賜詔嘉獎咸平
二年兼涇原儀渭邠寧環慶清遠靈州六路副都部
署尋徙正定高陽關押策先鋒也定州明年副超為
鎮州都部署徙定州四年召還以鄜州觀察使充靈
環十州軍副都部署兼安撫副使夏人圍清遠軍頓
積石河城遂陷又以青岡峽砦遠水泉焚棄退保洪

德砮建繫流崖州明年移道州景德初起右領軍衛
將軍分司西京累遷左領軍衛大將軍領賀州團練
使知兗州州卒言能飛行空中折其足奏戮之卒年
六十七錄其子舜臣為奉職舜賓內殿崇班閣門祇
候

李渭字師望西河人僑河陽進士起家為臨潁縣主簿
累官至太常博士河決滑州天聖初上治河十策參
知政事魯宗道行河奏換北作坊副使為修河都監

尋罷為鄆州兵馬都監徙知憲州又知鳳州兼階成
州鈐轄屬戶陷階州沙灘砦渭知都校趙釗擾之奏
流釗道州以恩信諭首帥復其砦遷軍器庫副使歷
知原環慶三州詔舉勇略李諮以渭應詔徙益利路
兵馬鈐轄領惠州刺史遷東八作使擢西上閣門使
徙鄜延路再遷四方館使寶元元年元昊將山邈來
歸渭與知州郭勸謀卻之既而元昊拒命又奏元昊
表猶稱臣可漸屈以禮渭初兼知鄜州坐事貶尚食

使知汝州徙磁州復降右監門衛將軍白波兵馬都
監卒

文彥博字寬夫汾州介休人本敬氏以避晉高祖宗翼
祖諱改焉少與張昇高若訥從穎昌史炤學炤母異
之曰貴人也待之甚厚及進士第知翼城縣通判絳
州為監察御史轉殿中侍御史言偏校臨陣先退望
敵不進大將守著令皆申覆此可施之平居無事時
爾今擁兵數十萬而將權不專兵法不肅將何以濟

上嘉納之黃德和誣劉平降賊平家二百口皆械繫
詔置獄於河中鞠治得實他御史復來拒不納曰案
具矣德和并平奴卒就誅以直史館為河東轉運副
使鄜州餉道回遠銀城河外有唐時故道廢弗治彥
博父洎為轉運使日將復之未及而卒彥博嗣成父
志益儲粟元昊圍城十日知有備解去遷天章閣待
制都轉運使連進龍圖閣樞密直學士知秦州改益
州嘗擊毬鈴轄解聞卒長杖一卒不伏呼入與杖又

不受復呼入斬之竟毬乃歸召拜樞密副使參知政
事明鎬討王則久不克彥博請行命為宣撫使賊潰
拜同中書門下平章事集賢殿大學士薦張瓌韓維
王安石等恬退守道乞褒勸以厲風俗與樞密使龐
籍議省兵凡汰為民及給半廩者合八萬論者為必
聚為盜上亦疑焉彥博曰今公私困竭正坐兵冗脫
有難臣請死之其策訖行進昭文館大學士御史唐
介劾之介貶彥博亦罷為觀文殿大學士知許州改

忠武軍節度使知永興軍至和二年復以吏部尚書
同中書門下平章事昭文館大學士與富弼同拜士
大夫皆以得人為慶三年正月受朝扶入禁中呼內
侍史志聰問狀對曰禁密不敢漏言叱之曰爾曹出
入禁門不令宰相知起居欲何為邪自今疾勢增減
必以告不爾當行軍法又與同列劉沆富弼謀啓醮
大慶殿因留宿殿廬志聰曰無故事彥博曰此豈論
故事時邪知開封府王素夜叩門上變不使入明旦

言有禁卒告都虞候欲為亂沆欲捕治彥博召都指
揮使許懷德問都虞候何如人懷德稱其愿可保彥
博曰然則卒有怨誣之耳當亟誅之以靖衆乃請沆
判狀尾斬於軍門先是弼用李仲昌策穿六漯渠故
道北京留守賈昌朝素惡弼陰約內侍武繼隆令司
天官二人俟執政聚時抗言不當穿河北方犯禁忌
彥博知其意有所在然未有以制之後數日二人又
上言請垂簾彥博視而懷之不以示同列而有喜色

徐名二人曰天文變異汝職所當言也何得輒預大
事汝罪當族二人懼色變彥博曰自今無得復然乃
出狀示同列同列皆憤怨曰奴敢爾僭言何不斬之
彥博曰斬之則事彰灼於中宮不安衆皆曰善既而
復使二人往定六潔方位繼隆白請留之彥博曰彼
本不敢妄言有教之者耳繼隆默不敢對二人至六
潔恐治前罪更言六潔在東北非正北也頃之彥博
等始歸第當是時賴彥博弼持重衆心以安御史吳

中復乞召還唐介彥博因言介言臣事多中臣病其
間雖有風聞之誤然當時責之太深請如中復奏時
以彥博為厚德久之以河陽三城節度使同平章事
判河南府封潞國公改鎮保平判大名府又改鎮成
德遷尚書左僕射判太原府俄復鎮保平判河南母
憂英宗起成德軍節度使三上表乞終喪許之初彥
博與富弼等乞立儲嗣仁宗許焉而以後宮就館故
其事緩及服闋復以故官判河南入覲上曰朕之立

卿之力也彥博竦然對曰此永昭聖意及慈聖協贊之力臣何力之有兼臣時在外皆韓琦等承聖志臣無與焉上曰備聞始議卿於朕有恩彥博遜避不敢當上曰暫煩西行即名還矣尋除侍中徙鎮淮南判永興軍入為樞密使劍南西川節度使熙寧二年相陳升之詔彥博朝廷宗臣其令升之位下以稱遇賢之意彥博曰國朝樞密使無位宰相上者獨曹利用嘗在王曾張知白上臣忝知禮義不敢效利用所為

以紊朝制固辭乃止大順敗慶帥李復圭妄奏鈐轄李信罪彥博暴其非宰相王安石曲誅信等秦人寃之慶州兵亂彥博曰朝廷宜兼采衆論以靜重為先慶州事蓋更張之過也祖宗法未必皆不可行但有偏而不舉之敝爾安石知為已發奮然排之曰求去民害何為不可御史張商英遂撫樞密使他事以揺彥博坐不實貶彥博在樞府九年又以極論市易司監賣果實損國體斂民怨為安石所惡力引去拜司

空河東節度使判河陽徙大名府身雖在外而上眷有加轉運判官汪輔之輒奏彥博不事事上批其奏曰以侍中舊德故煩臥護北門細務不必勞心未幾輔之罷去初選人李公義請以鐵龍爪治河宦者黃懷信沿其制為濬川杷安石信之都水丞范子淵奏用杷之功水悉歸故道退出民田數萬頃詔大名核實彥博言河非杷可濬雖甚愚之人皆知無益臣不敢雷同因上復遣知制誥熊本等行視如彥博言子

淵請覲言本等見安石罷意彥博復相故傅會其說
御史蔡確亦論本本等皆得罪獨彥博勿問尋加司
徒元豐二年拜太尉復判河南時王同老言至和中
議儲嗣事彥博適入朝神宗問之彥博復曰此仁祖
知子之明慈聖擁佑之力臣等何功上曰卿深厚不
伐善陰德如丙吉真定策社稷臣也彥博曰臣等雖
嘗有請弗果行其後韓琦等訖就大事蓋琦功也上
曰發端為難正如丙吉霍光不相揜也遂加兩鎮節

度使辭不拜將行賜宴瓊林苑兩遣中謁者遺詩祖道當世榮之王中正經制邊事稱受密旨募禁兵彥博以無詔拒之中正亦不敢募而去久之請老以太師致仕居洛陽元祐初司馬光薦彥博宿德元老宜起以自輔宣仁后將用為三省長官而言事者以為不可乃命平章軍國重事六日一朝一月兩赴經筵恩禮甚渥然彥博無歲不求退居五年復致仕紹聖初章惇秉政言者論彥博朋附司馬光降太子少保

卒年九十二崇寧中預元祐黨籍後特命出籍追復
太師諡曰忠烈彥博逮事四朝任將相五十年名聞
四夷元祐間遼使耶律永昌劉霄來聘望見彥博於
殿門外却立改容曰此潞公也邪何壯也館伴蘇軾
曰使者見其容未聞其語其綜理庶務雖精練少年
有不如其實穿古今雖專門名家有不逮使者拱手
曰天下異人也既歸洛西羌首領温溪心有名馬請
於邊吏願以餽彥博詔許之其為外國所敬如此彥

博雖窮貴極富而接物謙下尊德樂善恐不及賓接
邵雍程顥兄弟如布衣交與富弼司馬光等十三人
用白居易九老會故事置酒賦詩序齒不序官為堂
繪像其中謂之洛陽耆英會好事者莫不慕之導洛
通汴主者過洛水不使入城彥博嘗因中使劉惟簡
以聞詔令通行如初八子皆歷要官第六子及甫初
以大理評事直史館與邢恕善元祐初為吏部員外
郎以直龍圖閣知同州彥博平章軍國由右司員外

郎引嫌改衛尉光祿少卿知河陽召為太僕卿權工
部侍郎罷為集賢殿修撰提舉明道宮同文之役公
論非之亦坐奪職未幾復官卒

狄青字漢臣汾州西河人善騎射初隸騎御馬直選為
散直寶元初趙元昊反為三班差使殿侍延州指揮
時士卒多畏怯青行常為先鋒凡四年前後大小二
十五戰中流矢八破金湯城略宥州屠榜密綏羌楊諾
爾桑羅青齊家口等族燔積聚數萬收其帳二千三

百生口五千七百又城橋子谷築招安豐林新砦大
郎等堡皆扼賊要害嘗戰安遠被創甚聞寇至即挺
起馳赴衆爭前為用臨敵被髮帶銅面具出入賊中
皆披靡莫敢當經略判官尹洙與談兵善之薦於經
略使韓琦范仲淹曰此良將材也二人一見奇之待
遇甚厚仲淹授以左氏春秋曰將不知古今匹夫勇
爾青折節讀書悉通秦漢來將帥兵法益知名累遷
西上閣門副使擢秦州刺史涇原路副都總管經略

招討副使加捧日天武四廂都指揮使惠州團練使
仁宗命圖形以進元昊稱臣徙正定路副都總管歷
侍衛步軍殿前都虞候眉州防禦使遷步軍副都指
揮使保大安遠二軍節度觀察留後又遷馬軍都指
揮使青奮行伍十餘年而貴面涅猶存上敕傅藥除
字青指其面曰陛下以功擢臣不問門地臣所以有
今日由此涅爾臣願留以勸軍中不敢奉詔以彰化
軍節度使知延州權樞密副使皇祐中廣源州蠻儂

智高陷邕州圍廣州楊略等經制無功又命孫沔余靖安撫青上表請行翌日入對言願得蕃落騎數百益以禁兵羈賊首致闕下上壯其言除宣徽南院使宣撫荆湖南北路經制廣南盜賊事置酒垂拱殿以遣之時智高還據邕州青合孫沔余靖兵次賓州先是將偕張忠皆敗死青戒諸將毋妄與賊鬪廣西鈐轄陳曙乘青未至輒以步卒八千犯賊潰於崑崙關殿直袁用等皆遁青晨會諸將堂上揖曙起拜召用

等三十人按以敗亡狀驅出軍門斬之沔靖相顧愕
眙諸將股栗已而頓甲令軍中休十日覘者還以為
軍未即進青明日乃整軍馳一晝夜絕崑崙關出歸
仁鋪為陣賊既失險悉出逆戰前鋒孫節搏賊死山
下賊氣銳甚沔等懼失色青執白旗麾騎兵縱左右
翼出賊不意大敗之追奔五十里斬首數千級其黨
黃師宓儂建中智中及偽官屬死者五十七人生擒
賊五百餘人智高夜縱火燒城遁遲明青按兵入城

獲金帛鉅萬雜畜數千招復老壯七千二百斂屍築
京觀時賊屍有衣金龍衣者衆謂智高已死欲上聞
青曰安知非詐邪寧失智高不敢誣朝廷也初青至
邕瘴霧昏塞或謂賊毒水上流一夕泉湧若下汲之
甘衆遂以濟復為樞密副使遷護國軍節度使河中
尹還至京拜樞密使賜第敦教坊優進諸子官秩初
青行敕飲食臥起皆宜防竊發及聞破賊顧宰相曰
速議賞緩則不足勸矣始交趾願出兵助討智高余

靖言其可信青既至檄靖無通使假兵即上奏曰李
德政聲言將步兵五萬騎一千赴援非其情實且假
兵於外以除內寇非我利也以一智高而橫蹂二廣
力不能討乃假兵蠻夷蠻夷貪得忘義因而啟亂何
以禦之請罷交趾助兵從之賊平人服其有遠略青
在樞密四年每出士卒輒指日以相矜誇罷為同中
書門下平章事判陳州明年二月卒發哀贈中書令
諡武襄青慎密寡言計事必審中機會而後發行師

先正部伍明賞罰與士同飢寒勞苦敵猝犯無敢後
先故其出常有功尤喜推功與將佐智高既平經制
餘事悉以諉沔沔始歎其勇既而服其為人尹洙貶
死悉力調其家事子諮詠並閣門使詠數有戰功熙
寧元年神宗以青起行伍而名動夷夏能保全終始
慨然思之命取畫象入禁中御製祭文遣齋中宰祠
其家

郝質字景純汾州介休人少從軍挽彊第一充殿前行

門換供奉官為府州駐泊都監主管麟府軍馬與田
拙護軍須餽麟州道遇西夏數千騎先驅力戰斬首
獲馬數百又與拙行邊至柏谷敵塹道為阻質禦之
於寒嶺下轉鬪逐北遂修復寧遠諸柵宣撫杜衍安
撫明鎬連薦之起遷內殿承制并代路都監賈昌朝
薦為大名路鈐轄使討貝州文彥博命部城西回河上
有亭甚壯彥博遣小校藺千守而質使千往他營千
去亭焚彥博將斬千質趨至帳下願代千死彥博壯

其義兩釋之自此益知名遷六宅使歷高陽關定州并代鈐轄駐泊副都部署龍神衛捧日天武都指揮使馬軍殿前都虞候領賀州刺史英州團練眉州防禦使城豐州進步軍副都指揮使宿州觀察使乞還宿衛改馬軍英宗遷武昌軍節度觀察留後加安德軍節度使為殿前副都指揮使神宗易節武昌為都指揮使元豐元年卒駕親臨贈侍中諡曰武莊質御軍有紀律犯者不貸而享犒豐渥公錢不足出已俸

助之繇微賤至貴胥以功次遷自奉簡儉食不重肉
篤於信義表揭田耻前功官其一孫善朝士董熙約
為婚妯熙死家貧竟以女歸董氏

李浩字直夫西河人通兵法以父定蔭從軍破儂智高
韓絳城婁領兵戰賞保嶺川殺大首領訛草多移
斬千三百餘級積官供備庫副使廣西都監著安邊
策王安石言之上詔對改管幹麟府兵馬又從章惇
於南江引兵由三路入敘州討舒光貴破盈口柵下

天府擊殺狝狝降田元猛元喆遂城懿州進討黔江
蠻復城黔江惇上其功謂不當與他將比擢引進副
使熙河鈐轄李憲討山後羌將右軍至合龍嶺會戰
遣降羌乞噶突敵帳俘其酋冷雞樸李密撒戡二千
遷東上閣門使為副總管知河州安撫洮西五路討
夏將前軍復蘭州遷引進使隴州防禦使知蘭州兼
熙河涇原安撫副使坐事貶秩旋以戰吃羅瓦共連
立功復之哲宗拜忠州防禦使捧日天武都指揮使

馬軍都虞候進黔州觀察使歷郟延太原永興環慶
路副都總管再知蘭州卒贈安化軍留後

王奇汾州人武舉中第章惇經營湖北溪洞以為將領
將其首舒光貴縛元猛平懿洽等州累遷如京副使
為湖南都監徙廣西宜州蠻寇邊奇至天河縣期旦
日會戰裨將費萬夜以衆竊出河泥隘戰歿後數日
蠻萬人驟集奇輕出遂敗麾下猶數百人勸策馬逃
去奇罵曰大丈夫當盡節以報國何走為遂戰死詔

贈皇城使忠州防禦使官其家六人仍賜金帛

李彥哲平遙人屢有武勲累官兵馬大元帥

金

李洵仁平遙人授麟州新泰縣令皇統間大兵陷平遙
時援兵五千編戶數百家胥被害骸骨遍野洵仁以
宦遊免害及歸深用憫惻同令梁琮募人拾遺骸萬
餘於城西北鑿巨塚葬之其子致堯鄉貢撰碑銘記
其事立大興觀門右

張崑起字傅霖汾州人為國子助教免歸盜陷汾州崑起與妻赴井死

元

杜豐字唐臣西河人儻有大志通兵法仕金為平遙義軍謀克入元授兵馬都提控累功遷河東兵馬都元帥後為沁州長官勸課農桑寬徭薄賦民以富庶境內肅然沁人立祠祀焉封沁陽公子孫遂家於沁陳資壽其先永樂人任本縣次官監軍適金末兵燹之

餘剿捕羣寇綏輯人民歷官昭毅大將軍子政以武績歷官定遠大將軍致至元中以本縣令歷宜興州

同知

杜珏字舜臣珪第二子宣授河東南北路奧魯萬戶侯子安民襲父爵安民子惟孝興魯千戶惟孝子謙蒙古教授官

梁秉鈞字仲平性寬厚純粹鄉黨稱之仕至大理評事子七瑜玫瑛珪珍瓊琮

梁瑜秉鈞子性純厚體貌魁梧年二十四為本邑令寬
仁有容吏民懷之卒於官

梁瑛瑜弟孝友正直醇儉有大志善騎射勇力絕人金
末元兵南下瑛率眾詣軍門上謁授元帥左監軍屢
出奇計入關定秦隴陞行都元帥以縣行平安州事
安集勞徠人獲寧息武仙陷平陽瑛進兵仙大敗棄
城走入覲授御前千戶扈從南征鳳翔西和興元數
城俱下次唐鄧與金兵戰於三峰山大破之時軍民

降附日衆他將以糧不給謀盡殺之瑛曰殺降不祥
凡隸麾下悉得不死從元帥達罕甘布入蜀宋人守
瞿塘兵不克進瑛作皮渾航以濟塔奇之秦權征行
萬戶留鎮興元又從圍資州踰月始下塔怒欲悉坑
之瑛曰今始得一城而坑之他城未易下也塔善其
說瑛起行陳經百數十戰未嘗敗北所全活者亦不
下數萬計成都平詔充西京平陽太原京北延安五
路萬戶瑛以太原初定請給復三年詔從之尋卒年

六十有六子四長翼襲行軍千戶遷成都轉運使次
羽太原路管軍千戶珙先亡天翔別有傳孫十一偉
宣武將軍行軍總管儀偁傑秦王府侍衛太原路管
軍千戶曾孫十四思賢思敬行軍千戶之才從仕郎
冀寧路保德州判官

梁琮秉鈞少子繼兄瑜為本邑令子翔平陽路太平縣
尹翥文水縣尹翥子用剛延安路鄜州同知用直絃
興路蕭山縣尹

梁天翔字飛卿瑛季子也少磊砢便騎射讀書能通大義以文階起年十八尹本縣平遙每名父老訪民間利病歲旱禱於超山獲大稔民勒石頌德中統五年制授懷孟路總管至元九年尹介休建學明農會南方騷動簡兵編戶以戍天翔第其眾寡甲乙無頗私焉知鄧州州初附不送之徒相聚為盜嚴捕首惡餘釋不問授簽嶺南廣西道按察司事摘奸發伏郡邑以寧遷廣東道提刑按察副使劾奏土豪黎德改四

川按察副使歲饑天翔請王者發米四萬斛賑之不
及上聞謂報下民殍矣桑哥秉政校天下錢穀天翔
不事別剝寬猛適中廉部南郡建言選良撫臣以安
八番授浙東海右雲南行御史臺侍御史乘傳上二
十餘條以聞皆切於當世之務世祖深嘉納焉授吏
部侍郎高麗饑以天翔往賑授成都路總管改四川
道肅政廉訪使年五十五卒追封安定郡侯子六時
中進士信州路總管治中時正大名路清河縣尹時

仁簽浙東海右道廉訪司事時義成紀縣尹時智時
信

袁湘字潤夫臨縣人累功任延安路兵馬都總管大元
帥親勸耕稼裁抑浮濫使各食其力鄰境聞之咸願
歸附屢建言軍民利病上嘉納子克忠四川道提刑
按察使克良提舉太原採木司

鄭允中石樓人初為浙東廉訪使累官冢宰德被生民
功施社稷封魏國公

鈕克讓介休人父文敦德樂義善教子克讓始歷岳州
武昌二郡推官用法平恕守龍陽郡多善政州人勒
石頌之終宣慰副使追封汾陽郡伯贈父官爵如之
褚君實字不華石樓人沉默有器局泰定間累官淮東
廉訪副使時汝穎盜發勢張甚君實行部至淮安極
力守禦城陷被執不屈為賊所齧子伴哥冒刃護之
亦見殺君實守淮五年經數百戰不挫精忠大節人
比之張巡事聞追封魏國公諡忠肅

李邦用介休人少有大志不泥俗學孝弟出於天性後登進士居官教人以孝弟為先時望歸之

王珪介休人至正間碗子城討賊有功陞部兵元帥後曹濮賊亂又討平之陞都督大元帥

王仲文介休人由才能至正十八年授河南汝寧府光州判官二十年改儒林郎總管府判官二十六年拜中書省門下省丞相

明

辛彥博汾州人初名彥德洪武中貢入太學為高皇帝所知賜今名蓋以潞公相期也旋授監察御史秩滿遷浙江按察司使以誑誤左遷繼又擢都察院右僉都御史改詹事府詹事上書忤旨調又以保舉違例調繼又仍遷浙江按察司使永樂初以擅責指揮陳仲禮謫戍興州未幾召還復除監察御史補福建布政司參議伴送瓜哇使臣赴行在文皇帝一見謂廷臣曰是老實辛某先帝所嘗器重者特授浙江左布

政使彥博叩頭謝因乞省墳墓得旨馳驛歸後卒於任所彥博居官四十年委身忘家墓門片石不能備彪嶺文湖間言清修苦節者必以彥博為首稱云

張僕平遙人建文己卯舉人性端嚴言動不苟初授磁州判官以廉能著入為左春坊司直郎侍皇太子讀書朝夕勸導以聲色寶玩最易喪志出入起居防範尤密上聞賜荆杖勞之未幾謝事去後屢行徵辟卒高臥不起

曹興介休人永樂辛卯進士授行人讀書過目不忘博
通諸史名重當時以病歸止騎一驢行李蕭然

武允介休人永樂丁酉舉人通明五經博覽羣籍恒以
啓迪後進為心初授陝西寧遠縣學教諭復除直隸
盧龍縣學所至有聲尋乞致仕鄉後學翕然宗之

胡福介休人湖廣武定衛軍士永樂間從本衛指揮征
南生擒麗王陞本衛指揮

柴莊汾州人監生宣德末知金縣廉正愛民秩滿百姓

保留增俸復知縣事

王約寧鄉人正統中貢授定州知州持已以禮撫民以恩正統間官軍逐寇糧芻不給設法厝置事濟而民不擾

董瑾字文玉介休人正統間貢任陝西甘州中護衛經歷剛直勤廉秉公執法時有貴宦滕蛟妹以不孝詞投瑾瑾不少恕御史李受囑轉囑於瑾瑾不聽卒置之法

任義平遙人景泰庚午舉人孝思純篤執喪廬墓三年
知真寧鞏二縣操持端潔教民勤稼煦之如子民立
遺愛碑

李穎平遙人天順己卯舉人授兗州府通判清介自持
祈禱輒應民作清泉詩以歌之祭酒王雲鳳亦服其
廉謂有太古之風

武賢孝義人貢士有孝行生能盡事沒能盡思天順間
任元氏知縣政務簡靖有訟者反覆以理喻之不加

刑民競勸以訟為戒園扉有宿草焉調興平縣老弱
扳轅不忍別其治興平亦如元氏

溫廉介休人成化戊子舉人授山東濟南府同知招撫
流移奏除民害九年陞雲南尋甸知州復除澂江知
府時土賊猖獗殲其巨魁餘悉解散以禮匡俗政聲
益著澂江素無城郭凡衙門公署城池皆創建焉

周儀孝義人成化辛卯舉人正德中任鄆縣教諭與諸
生約雞鳴起勤誦書史怠佚者有罰縣城隍廟值會

期聲伎繁艷觀者塞途諸生無一敢延佇者秩滿陞
保寧府教授篤於訓迪一如鄆縣時事

馬驥介休人成化甲午舉人親偉學充善迪後進遠邇
來學者多登科第初任寶坻知縣朝司民事暮訓青
衿臨事果斷不阿貴幸邑多皇莊草魚等廠中貴權
幸時騷擾為害驥特奏准兵部出榜通行禁草一時
頌聲溢於中外

文瑞介休人成化乙未進士授行人却唐沈二府饋金

擢監察御史按畿甸有中貴侵民田直而歸之又巡山東百僚震肅得風憲體時值亢旱親出祈禱雨即降人皆異之後陞山東按察副使兵備遼陽節操愈勵卒於官

車震石州人成化辛丑進士性慙直初授刑部主事歷員外郎中與堂上官語是非無稍回互出知平涼府以嚴為治吏胥奉法唯謹藩府宗室亦無敢以私干者涖任八年遷本省參政入為苑馬寺正卿擢右僉

都御史巡撫宣府修舉邊政課功最一時致仕歸卒
賜祭一壇

張翼介休人成化甲辰進士授刑部主事歷員外郎中
出為保寧府知府遷本省兵備副使貴州湖廣叅政
擢右僉都御史巡撫甘肅尋召入理院事翼性耿介
不妄取予釋褐後翔步郎署清望最著為副憲日羌
人屢肆劫掠督兵勦除悉龍言伏在甘肅殫心區畫獲
功一十六次比晉長臺端風采凜凜未幾請告歸卒

任良才平遙人成化丁未進士初授江陰知縣陞高郵知州歷任清介性至孝母病嘗糞父病願以身代至教誨民人媿媿不倦賢愚皆獲其益

車梁石州人成化時為御史十五年條列時政中言東廠錦衣衛所獲盜先嚴刑具成案然後送法司法司不敢平反請自今徑送法司毋先刑訊章下未報主東廠者言梁從父郎中霆先以罪為東廠所發挾私妄言遂下詔獄給事御史論救乃獲釋遷漢陽知府

卒

劉端寧鄉人舉人成化間西安府同知明曉水利委心民事修治渠堰人被其澤既去任民恒追思之

宋銳臨縣人例貢知洋縣時蓋馮警擾軍書旁午外給軍餉內撫民心邑賴以安

田耔汾陽人弘治己酉舉人長清知縣居官鯁直一介不妄取事親孝養誠至及親歿廬於墓所哀毀骨立嘗有早霜殺禾獨親墓禾不傷人以為孝感

賈璇汾州人弘治庚戌進士初任戶部主事歷員外郎
中嘗督鈔揚州羨餘盡歸之官行賑江北調度有方
正德初守闕乞誅劉瑾等不報出補陝西右叅議未
幾為瑾所陷歸及瑾伏誅朝廷將大用之以目疾辭
時論惜焉

石瓚介休人弘治壬子舉人授羅山知縣時遇流賊亂
瓚孤城獨守鏖戰月餘殺賊有功招集流民時使簿
畝知府謂羅民曰汝等天堂上百姓耶後陞萊州府

通判守制歸遂不復仕祀羅山名宦

任良弼平遙人凡良才文壇稱雙壁弘治癸丑進士選翰林院庶吉士授刑科給事中遷本科右給事中歷戶吏兩科左給事中遷吏科都給事中持論侃侃權貴側目遷通政司左叅議與逆璫劉瑾忤降補建昌府通判復矯詔下獄謫遼陽在戍籍中意氣亭亭不少屈瑾誅起通政司右叅議良弼居官三十年澹泊如書生比歿家惟琴書

嚴秦汾州人弘治丙辰進士初任戶部主事丰裁峻潔
不妄取予督鈔蘇州蔬食飲水而已鈔關有便民小
關後并徵稅秦至罷之吳人謠曰許墅灘頭無濁水
蘇州關上有青天後歷登州知府廉平為東都最卒
以介直忤時抗疏歸杜門罕交接服母喪終身不除
張鍵字君重石州人正德丁卯鄉舉戊辰成進士授南
京戶部主事忤逆瑾逮至京師不為屈調衛輝府通
判瑾誅復戶部主事督儲天津流寇奄至鍵登陴誓

衆晝夜不怠卒你無虞薊州莊田累經奏贖不決鍵
履畝清覈歸其侵於民督餉關西招商搜逋士無饑
色會蘭州大饑死者枕籍鍵發粟賑之全活甚衆及
歸蘭民遮泣立石志思尋陞開封知府開封中州省
治隸縣四十餘文移傍午揮洒如流凡事之不便於
民者必釐革之未幾卒

劉尚忠汾州人正德丁卯舉人授合水知縣邑僻事簡
尚忠靜厚不擾蒞政五年晝日清閒有白烏常集於

庭陞平京通判

張珩石州人正德卒未進士授監察御史累陞大理寺少卿僉都御史巡撫延綏尋遷南京都察院右副都御史提督操江未幾召入協理院事進左副都御史會宣大總督罷廷議屬珩珩以鄉曲辭為言者所指落職久之以原職起巡撫寧夏進兵部右侍郎兼右僉都御史總督陝西三邊前後獲首功甚衆上數賜璽書金幣勞之進右都御史居數歲拜戶部尚書督

理大倉未至值延綏有警坐失事被逮謫戍慶陽已
復起為副都御史巡撫延綏遷前職丁母憂歸卒於
家年七十餘賜祭葬如例贈工部尚書謚襄敏珩行
履修潔器識弘遠尤博綜羣籍為御史時會講官缺
輔臣有謂珩才行可充侍從者欲推轂入翰林珩三
疏不就時論高之

賈繼之璇子正德甲戌進士歷官戶部郎中寬厚廉謹
有儀度未第時省父揚州有遺千金求通關節者不

納便告歸父曰既來定省何遽歸耶曰恐在此多事
或負大人清訓耳及為郎理錢穀一無所私卒於官
溫恭平遙人驍勇絕倫正德間有功任征西大元帥子
孫世襲

賈越石州人正德中以貢授汧陽縣知縣清正有特操
遇事立決本境盜起簡鄉勇往勦之不勝遂以身殉
高金石州人嘉靖丙戌進士歷兵科給事中有疏請止
汰生員逐陶真人而於豪張孝皇親牛氏胥以法治

之不少貸上聞之曰直臣直臣陞山東按察司副使
王與齡字受甫寧鄉人嘉靖八年進士授蘇州推官入
為戶部主事調吏部進員外郎受業崔銑友羅洪先
唐順之趙時春鄒守益徐階二十一年遷文選郎中
澄清銓敘所推薦皆廉靜老成大學士翟鑾為禮部
主事張惟一求吏部嚴嵩為監生錢可教求東陽知
縣偕主事周鈇等白之尚書許讚具疏以聞言平時
請屬甚多臣等違抗積罪如山非聖明覆庇則二權

奸主於中羣鷹犬和於外臣等不為前選郎王嘉賓之斥得為近日御史謝瑜之罷幸矣疏入鑿言惟一應遷嵩抵無致書事因言聖明獨斷而讚等妄意臣輩為之借以修怨然讚柔良弟受制所屬耳上方信嵩又見疏中引嘉賓瑜事遂切責讚除與齡名鉄等俱調外給事中周怡論之廷杖繫獄御史徐宗魯等亦以為言皆奪俸自是諸司以與齡為戒無復敢與嵩抗與齡既罷錦衣遣偵其裝襪被外無長物稱歎

而去里居角巾躬稼圃郡人為作平陽四賢詩美之
四賢者尚書韓文陶琰張潤及與齡也閱二十餘年
卒

嚴霜臨縣人正德中貢嘉靖八年知襄城縣性溫和簡
約以儲蓄為急遇雨暘祈禱如響施澤活人不受饋
遺廉潔之操終始如一

方金石州人為兵科給事中嘉靖九年上疏言陛下臨
御之初盡斥法王國師佛子近又斥姚廣孝配享臣

每歎大聖人作為千古莫及乃有真人邵元節者誤蒙殊恩為聖德累夫元節一道流耳有勞優以金帛足矣乃加崇秩復賜其師李得晟贈祭廣孝不可配享於太廟則二人益不可拜寵於聖朝望削元節真人號并奪得晟恩卹庶異端闢正道昌上方欲受長生術立下詔獄拷掠終以其言直釋之尋偕御史唐愈賢稽覈御用監財物劾奉御李興等侵蝕狀寘諸獄後累官蘇州兵備副使卒

雷潔平遙人嘉靖辛卯舉人授延長知縣居官九載平
易近人崇文好士嘗為修城垣建節孝諸石坊民尤
稱之

李翰字憲夫汾州人嘉靖甲午舉人高陵知縣存心平
易遇事練達值地震人民死者過半盜賊蜂起翰立
法甚嚴懲治渠魁不少徇民賴以安陞慶陽府同知
劉尚義汾州人嘉靖乙未進士由行人選御史稜稜有
威望尋調秦州判官改朝邑知縣遷松江同知督糧

餉不私其贏署府事草堂食費吏屬畏其介陞南京
刑部郎中出補四川僉事備兵西蜀兼督松茂邊餉
蜀人苦窳運尚義設法收給軍民兩便作八頌以詠
之轉陝西叅議河南副使卒於官家無餘蓄著柏山
集四卷

張玘石州人嘉靖乙未進士授清豐縣知縣入為兵部
主事游歷郎中出為永平府知府先是夢二朱衣人
遺墨二笏至是謁夷齊廟所見宛如夢蒞任三年擢

按察司使以去行囊蕭然論者以為有孤竹遺風晉
右僉都御史巡撫順天屢奏首功尋謫布政司叅議
復入為大理寺少卿遷順天府府尹轉南京戶部右
侍郎名為兵部右侍郎中途疾作至延津卒縣令發
其行裝止俸金一十七兩訃聞賜祭葬如例孫維以
廕仕至武定府知府

霍冀字堯封孝義人嘉靖甲辰進士初授永平府推官
以績最拜御史清軍浙江巡按河南破妖賊師尚詔

巡撫寧夏戎事甚飭上嘉之賚以金綺移鎮保定畿
右歲侵嚴武備發倉廩民賴全活蘇昌宣大以缺餉
告命徧歷疆場盡得耗蠹侵冒之實因條上恤軍通
商轉輸積貯四事總督三邊軍務厚恤死事汰諸將
不職者募丁壯激忠義修戰守具軍容一新隆慶丁
卯敵犯嵐汾石州軍書告急晉兵部尚書冀料天下
戎馬強弱邊塞要害及諸將帥材勇高下悉經略劑
量之宜籍田建儲大閱皆蒙恩錫以議憲臣功罪及

京營事宜兩忤輔臣乞歸年六十卒賜卹典如例

梁明翰字維憲孝義人嘉靖丁未進士授刑部主事歷
員外郎中出為慶陽府知府遷副使入為太僕寺卿
復出為陝西叅政遷四川按察司使性長厚與諸弟
析居所得俸錢仍分給居鄉賑窮恤困與人交恂恂
禮法居官平易近人為副使撫降獮賊人尤稱之年
八十三卒

張芹字獻之孝義人嘉靖丁未進士觀政解餉雲中愆

期左授山東布政司照磨署篆肥城有能聲陞安期
知縣招流墾荒民多復業補濟源均輸田畝里甲不
敢為奸陞戶部主事轉郎中勞勩著聞陞延安府知
府恩威並著土人為建生祠

王緝汾陽人緯子嘉靖己未進士授吉安推官以母老
迎養不便疏請就近改助教歷陞職方司郎中辛未
聘禮闈校士所收多碩彥擢太僕卿旋陞僉都御史
巡撫貴州苗民悉感化歸附恐後欽賜金幣令紀錄

進副都御史巡撫南贛後陞戶部侍郎緝放歷中外三十餘年勛績爛然所著有防邊紀略等書

陳謨寧鄉人嘉靖間舉人性清簡擇地而蹈時然後言非公正不發憤家範肅然子姓輩無一人敢軼矩矱之外歷官五任囊無長物士論重之

陳王道寧鄉人萬曆壬午舉人延川知縣調清澗陝西通志云理冤獄判決如流咸得其情四鄰控籲者皆假籍以希廉斷而褪躬廉潔士專其業民樂其生循

聲大起擢正定同知

王政字正之孝義人萬曆癸未進士初授宜陽知縣讞
獄稱平調清苑縣裁冗費撫流亡尤不阿權貴陞刑
部主事督漕運清別漕河轉輸弊竇褚司徒特薦於
朝居鄉鯁直即親厚玩法亦不少庇

范道行字太衢平遙人九歲能文善詩歌萬曆癸卯舉
人授河南澠池知縣立學校重農桑民感其德為立
生祠以魏璫索賄不應被劾歸闕賊之亂索餉甚急

道行清不能給罵賊被害

王守履字存予寧鄉人檢討縉子天啓辛酉壬戌聯雋
進士授許州知州州比歲不登兼徵發繹騷守履以
惠和愛利為先循聲滋起入為戶部員外郎疏陳崔
呈秀可殺四大罪中間並及陳爾翼奸狀及爾翼疏
辨即就其疏駁之復具奸黨情形愈真微臣觸奸非
妄一疏申理前說得嚴旨降調崇禎初起原官並給
父母誥命後改湖北監察御史子瑄以恩廕後補通

判

朱新堞家汾州崇禎十四年由宗貢生為中部知縣公
事出土寇陷城免官已而復任時賊入關毅然曰受
國恩無以報此吾致命之秋也既受事賊傳檄至怒
而碎之人情瓦解屬父老令速去而書表封印使人
馳送京冠帶望闕拜又望拜其母即自經士民葬之
社壇側以妻女祔

劉三元字聚奎平遙人崇禎庚午舉人性方嚴負節槩

初授欒城令欒人不種小田三元於原籍囊莩麥頌
示之民不知織為造紡車約幾日成一布令夫人親
課勤惰尋陞兵部車駕司主事兼戶部事出為寧遠
憲使會闖賊變三元慷慨飲泣與諸生范羽可等糾
集各路義師三河響應衆至數十萬及我

朝定鼎三元遂棄家為黃冠放浪山水間後遊欒城舊
治士民張樂伐鼓方於生祠為賽會三元徑入祠踞
坐取爵暢飲衆環視之始識為前令尹也羅拜痛哭

留止祠中晨夕事之如父母卒於藥城

王鳳翼寧鄉人崇禎丁丑進士授漢中推官時盜賊內
訐鳳翼設策防守增修城垣保安境內尋陞刑部主
事

朱敏濛號龍澤慶成府鎮國將軍軀幹甚偉好直言傲
岸之氣人多憚之會時事多故敏濛遂放浪不治生
理日延名流基酒自娛賊據平水汾人大恐敏濛發
困開筭分散貧窶絲粒無存者賊至徵餉無以應收

縛見闖左右使跪敏濛厲聲曰我將軍也太宗之膝
豈為賊奴屈哉闖令摔下敏濛振聲一喝摔者披靡
退數武羣賊蜂擁爭批其頰罵不絕口折頸裂股而
死

國朝

劉昇祚汾陽人順治初以進士任湖南道駐辰州賊黨
率兵來攻昇祚設守禦甚備間出奇兵擣之賊遁已
而擁衆數萬至昇祚擐甲登陴立矢石間指揮捍禦

賊相顧舌橋不敢下而以辰為滇黔咽喉攻擊益力
圍數月城陷昇祚大呼血戰手刃數賊以死僕溫虎
亦從昇祚力格鬪為賊殺事聞

贈光祿寺卿

予祭一壇廕子入監讀書

任長慶字雲石石樓人順治二年拔貢授中書舍人歷
工部郎中遷淮安知府補鳳陽道改臨洮道卒於官
長慶精心計有膽略任中書當從駕人皆憚之長慶

毅然請行姜逆變 大兵來討復請從行恢復多有
贊畫在工部權蕪湖龍江稅以廉潔著兩涖道臣事
胥得憲體著易解藏於家

趙永祚汾陽人順治丙戌進士授雷州府推官性剛決
執法不阿雷民時多匿山谷隸邑庠諸生裁百人永
祚得通文義者二百人附於學親為督課雷人始知
讀書盜王翰肆焚掠與同知周燦請其集開誠撫諭
翰投戈補慶陽府推官亦以清敏著卒後囊橐蕭然

人稱廉吏

王廷伊字嚴介號潔菴介休人前已卯舉人順治中知信陽州艱歸後知商州招撫流亡續修商州志內遷兵部職方員外轉車駕郎中典已酉廣西試遷瓊州道汰巡查檳榔規例瓊海稱之以繼母艱歸卒

師佐字靖公永寧人順治壬辰進士知福寧州招流亡嚴差役為文以驅虎患民立祠祀之遷蘇州府督糧同知釐漕蠹却漕規與糧戶約曰爾曹省一釐旁貲

則完一釐正供民恪遵之三督漕白解餉江廣疏濬
吳淞勘荒履畝胥彈厥職督撫兩疏薦會病卒蘇人
痛悼焉

高首標永寧州人幼嗜學以拔貢生考授通判尋兩副
山西榜順治甲午以第二人舉於鄉己亥成進士授
江西廣昌縣知縣內艱歸補廣東陵水縣知縣外艱
歸服闋仍補廣昌時耿逆未平偽將劉汝桂猖獗首
標單騎詣其營曉以大義劉心折解甲歸降廣昌旁

州縣胥復准軍功例加五級後以廉能行取吏部文
選司主事疾卒於道旅襯蕭然不能遂首邱會鄉人
于清端公總制兩江乃獲歸葬

于成龍字北溟永寧州人性廉而果前已卯副榜貢

國朝銓知羅成縣羅成無城郭室廬廨設篔簹間成龍
累聽事土為几案旁置一釜一盂炊烟併日而召吏
民從容問疾苦民寢習之乃編保甲籍彘豨以其暇
增陴濬隍招民入居城有大姓私號總戎侯伯指麾

長吏者叱令跪且杖下之獄埃叩頭謝死罪始免而里豪挾搖肆跳踉之害息盜胥屏跡舉卓異以涖羅成七年資知合州賦裁十有四兩供役繁重不支盡草之府帖下取魚卒不與流戶前編主戶搖墾田熟土著復輒爭之為區畫田廬牛種復三年而後編搖歸者千戶尋用卓異遷黃州府同知分司岐亭岐亭界黃麻地多汭湖幽壑捕盜獲九人集父老曰能保後不為盜者貫保二人立命繫七賊坑之又降大

盜彭伯鈐等攝漢陽黃安通城篆胥有循聲巡撫張朝珍特舉卓異會滇逆亂甲寅檄攝武昌府軍需胥吐嗟而具惡少憑禁旅立置法甲士十萬撫輿譁不為動徐斂去諜指武昌大姓交通狀成龍曰大姓多避兵良子湖中家人藏械備他盜也跡之果無他其識大體類此擢知建寧府朝珍奏改武昌造橋於蒲圻以濟師賊鋒逼亟入城嚴備城獲全而橋以山水暴漲圯遂罷職會東山寇作朝珍復委除賊成龍曰

黃州東連廬皖北接光固界三省控七十二寨而人多剽悍難猝勝必便宜行事始克濟朝珍許之曰需兵幾何成龍曰兵多適資亂偕前守蒲圻數人足矣先是妖人黃金龍詭言得天書匿麻城劉君孚家事寢泄君孚遂以五月十五日先發於曹家河黃守將王宗臣駐兵興福寺麻城令屈振奇駐白杲夜驚胥退保麻城成龍次陽邏偵知君孚以衆未合猶豫急抵白杲距賊十里榜諭之投訴日干計遂命白杲鄉

約持檄往而獨騎黑騾偕二人徑趨賊寨鳴鑼呼太守來君孚急匿後山令烏鎗弩手夾道伏成龍不顧直前入寨門下騾問老奴安在君孚嘗隸岐亭役老奴者易暱之辭也復曰熱甚須少憩因熟睡鼾聲如雷移時寤謾罵客至何不設酒脯君孚乃出叩頭成龍為開陳利害順逆許以招撫約日還盡降賊衆數千人朝珍上其事獲

命再知武昌府而留籍麻城區保烟民訖以還當是時金

龍繇君孚所復合紙棚河賊鄒君申成龍甫次歧亭
亟檄東南區長部鄉勇二千進望花山君申驚退保
山寨成龍策賊未獲食少利速戰乃分軍軍其三面
以黃岡馬鞍山為賊要徑也故不守陰置伏嶮岷竇
之君申金龍等果糧絕夜走馬鞍山遇伏盡擒金龍
縛急將遁手劒叱之遂斬其首捷聞晉級八月調知
黃州府十月江西賊掠興寧蘄州戒嚴而陽邏鎮陳
鼎業永寧鄉何士榮石陂劉啟業白水畝周鐵爪鮑

世庸胥擁衆數千人議者欲棄黃州退保麻城成龍
曰黃州為湖北門戶荆岳水陸運道且瀕江而城前
倚興寧廬阜後壓天堂金剛諸寨釋此不守則荆岳
胥狼顧矣今賊勢雖衆率取士榮進止若先破士榮
餘可不戰而下乃先遣黃岡令李經政禽鼎業陽邏
平十一月成龍絀服率弟子員吏卒二十二人會黃
協千總李茂昇把總羅登雲吳之蘭令部鄉勇二千
時謀報士榮據黃土坳遣登雲偕武舉張尚聖以偏

師往偵却賊前鋒而大隊疾馳屯箔金寨翼日賊數
萬繇牧馬厓分進命登雲率千人禦東道成龍自當
其西尚聖攻右之蘭攻左中鎗仆乃鞭馬徑前迴顧
茂昇曰我死可歸報張公茂昇恐失守急發矢剪賊
大旗復手刃數人而尚聖自右山繞出急擊賊大敗
士榮被擒登雲亦勝於東路斬馘凡數千獲賊名籍
立焚之衆乘勝至呂王城少憩成龍曰士榮既禽白
水石陂賊膽落所謂破竹之勢也若淹晷刻賊且據

險鬪命盡覆諸營午炊具而據鞍急草檄諭之賊解
散略盡又遣兵據白水畷隘鐵爪等不克上君孚亦
繇定惠院遁走後三日胥追禽之石陂賊亦平自出
軍訖班師裁二十四日東山大定乃禁羨耗絕私派
懲誣告勵經學又賑濟飢民全活數萬會繼母艱制
撫以金草之義固留視事十六年復設江防道於蘄
州就

命成龍營墩戍繕戰艦江境肅然十七年擢福建按察使

時耿逆初平罹重辟者衆獄業具成龍力白親王
通海數案牽引半平民遂釋不問生全千百人耿逆
掠淞東江右子女後沒為奴婢胥募贖之未決期又
擢布政使力請罷莖夫月數萬八郡正供江淞協餉
胥畫時收兌不少增銖黍而署舍或終日一食隨征
大臣時徑入臥內一竹筍貯朝服一釜備爨暨文卷
數十束而已貢舶呈樣香一奩輒命持還將軍制撫
交章舉卓異十九年春

命巡撫直隸糾貪墨懲豪強立保甲緝劇盜前後條上數
十事昏朝上夕報可二十年春請

陛見

命侍衛持席午門外少坐入見

賜坐問撫勦東山時事移時

賜帑金一千兩馬一匹

御製詩一章比督理

陵工還又

賜良馬一匹是歲宣府饑賑十餘萬戶九月

駕幸雄縣

勞賜有加冬請歸葬數日

特命晉兵部尚書總督江南江西減耗羨清漕規嚴營繕
敦布素而郡縣貪墨暴聞者糾劾不少貸墨吏日十
數驚又疏薦知通州俞成龍得

旨知江寧府而擇督學歲科兩試前茅士萃書院課之二
十三年巡海還護理安徽江蘇兩巡撫印四月疾驟

作卒年六十有八將軍都統僚屬來視周身布被一
具牀頭敝笥中絺袍一襲靴帶二事米暨鹽豉數盎
而已士民胥巷哭罷市建祠清涼山祀之訃聞

賜祭二壇給全葬

諭祭文曰朕惟國家敷治簡賢道先保障人臣奉公奏最
節重清勤苟四知之克嚴歷終始而弗替寵獲宜責恩
卹用昭爾于成龍志篤醇誠誼敦貞介甫膺民社聿著
循聲既懋旬宣彌彰令績是用畀以節鉞綏乃邦畿爾

克撫字維勤苞苴盡絕迨兩江遷鎮一節罔渝馭下則
大草貪風勵已則寒同儒素雖古廉吏曷以加茲迺倚
任方殷遂溘焉淪逝軫懷良惻異數頻頒嗚呼蕭然官
舍竟擔石之無存煥焉綸章庶泉臺之克慰必芬在御
尚其敬承又曰惟爾苦節克貞鞠躬匪懈真一介之不
取越數官而彌堅奄忽云亡能無憫焉嗚呼清風未遠
長存表德之思寵卹重頒丕著旌賢之典爾靈不昧其
克欽承已而

聖祖仁皇帝東巡還諭內閣九卿詹事科道曰國家澄敘官
方首重廉吏其治行最著者尤當優加異數以示褒揚
故江南江西總督于成龍操守端嚴始終如一朕巡幸
江南延訪吏治博採輿評咸稱居官清正為今古第一
廉吏應加褒卹為內外大小臣工勸其詳加議卹具聞
於是集議加太子太保諡清端廕一子入監讀書復
御製碑文曰朕讀周官六計弊吏曰廉善廉能廉敬廉正
廉法廉辯吏道厥惟廉重哉朕用是審觀臣僚有真能

廉者則委以重寄錫以殊恩所以示人臣之標準也爾
于成龍秉心樸直泣事忠勤而考其生平廉為尤著以
故累加特擢皆朕親裁蓋拔自庶官之中受節鉞之任
爾能堅守夙操無間初終古人脫粟布被或者嫌於矯
偽爾所謂廉本於至誠聞爾之風可以興起乃不憚遺
忽焉奄逝日者省方察吏南及江表採風謠於草野見
道路之謳思清德在人於今不泯惟爾之廉天下所知
朕俯合輿情載褒勁節既考名副實諡曰清端葬祭以

禮又晉之崇秩賜予有加恩卹爾子嗚呼人臣行已服
官事主之道爾可謂有始有卒者矣顧不可以風世也
與

賜扁曰清慎勤曰高行清粹

御書聯曰歷仕甘棠隨地蔭兩江清節至今傳海宇胥頌
旌廉盛典焉成龍嘗自言一生得力在令羅城而緝盜用
游傲暨降盜多神變不易測江防謁巡撫以盜屬訊
秘其事不發越二日引衆囚至略訊盡釋之巡撫驚

問真盜安在即指撫標一校曰盜王家也縛付訊成
龍曰羣盜數日當盡致既而胥立就縛贓在校家封
識如故若此類尤衆孫準巡撫江蘇

于準字子繩永寧州人成龍孫廷翼子以蔭知臨清州
陟刑戶二曹擢江南驛鹽僉事總督傅臘塔薦之擢
直隸守道會大軍西征輓饟牧騎胥辦擢浙江按察
使

賜廉察之寄四大字父艱歸服闋擢四川布政使

賜清慎勤扁尋擢左副都御史巡撫貴州鎮雄與雄所二
土目平州司陸起鳳與土目母楊氏歲讐殺爛土司
張大紀土目張宏謨威寧雄所土司安天貴麻洽翻
娘寨鮑溪等胥肆掠諭解之八十石寨種家苗盧君
甫結阿飽等與儂人燒却郎妹等寨遣兵破其衆擒
阿飽於陣君甫逸檄擒斬之遂復行合椿法所謂以
苗治苗也增級五移巡撫江蘇歲饑請截留漕糧五
十萬石

聖祖仁皇帝南巡

賜敷惠寧人扁愷澤三吳滋化雨節旄再世繼清風聯泣
任五載免雍正三年還職又四年卒

梁纘素永寧州人以歲貢授齊河知縣補文安卒於官
齊河歲饑發倉粟哺之男女老幼用旗標識俾以次
就食因為濬趙牛河築王龍堤民德之文安當九河
巨浸造水車數百具挹水注於河種杭稻得米數萬
斛又條上制府酌定旗丁圈地租法無得意為予奪

繇是五府胥視文安例比卒祀名宦



山西通志卷一百十四